

also: Ruck das Absehen ab den 600. Puncten auff die 100. Puncten/ vnd sprich es sind 600. (dieweil du 600. Schuch zu deinem stand hast genommen) so wirst du deinem begeren mögen nachkommen: Wann du das ander Absehen ruckest wie du gelehret wirst/ so schneidet dir das Absehen auff der Regel ab 920. Puncten/ alsdann wann du 920. zum sechsten mal nimbst oder vermehrest/ so findest du 5520. vnd ist also an das begerte orth hinaus 5520. Schuch.

Wann es aber ein Meil wegs oder mehr an das begerte orth hin ist/ so misse zwischen beyden Ständen mit Ruten/ wie es die Büxenmeister brauchen (wie ich in dem 2. Capitel darvon meldung gethan) die 10. Schuch lang sind. Als zu einem Exempel: Du nimbst 100. Ruten zu deinem stand/ das gibt 1000. Schuch vnd ruckest das Absehen auff der Regel auff die 100. Puncten/ vnd das ander zu der weite hinaus/ so findest du auff der Regel 940. Puncten/ so ist die begerte weite 9400. Puncten. Ruckest du aber das Absehen von den 100. Puncten auff die 50. Puncten oder Grad/ so gibt es 15000. vnd 500. Schuch an das begerte orth hinaus.

Stiefhabt
kan in die tief
fe gemessen
werden als in
die höhe.

Weiter ist zumercken/ wann einer ein tieffe eines Brunnens messen wolt/ oder an ein ander orth/ vnd nit mehr als 10. schuch zu seinem stand möchte haben/ oder noch minder/ von wegen vngelegenheit des places/ so thue ihm also: Rucke das Absehen auff 100. oder auff die 200. Puncten (vnd du hast 10. Schuch zu deinem stand) vnd dz ander Absehen schneidet auff der Regel ab 800. Puncten/ sprichst du das die Tieffe oder Höhe ist 80. Schuch/ weil das Absehen auff den 100. Puncten gestanden ist.

Also wirst du kunstliebender/ dich nach diesem Bericht wol wissen mit diesem Instrument zuhalten/ dann die vbung solches alles mit sich bringen wirdt.

Das